


BAEBELE, MOKAPO YA MIBALE ¹

 ...?...bazalaki awa na kelasi mpe basepelaki na... [Maloba mazangi na eteni oyo ya bande—Mok.] Mpe sikawa, Buku ya liboso ya Baebele, ezali ya Paulo, tomonaki bongo, to tondimaka bongo. Ba-theologien bakomi na nsuka; bayebi te ezali ya nani, to nani nde akomaki Yango. Kasi, nandimaka, moto nyonso oyo azali na mwa lisosoli ya molimo akomona ete ezalaki Paulo. Endi—endimamaka, na mingi ya bakomi, ete ezali Paulo. Mpe ndenge oyo ye. . .

² Na mokapo ya 1, tomonaki ete azalaki kotombola Nkolo Yesu. Oh, amemi yango malamumpenza, mpo na kotalisa na nzela na—na nzela na makambo oyo abikelaki ntango azalaki na nzela na ye kokende na Damaseke. Sikawa, mpo na kobanda, Paulo azalaki theologien ya solosolo. Paulo ayekolisamaki na makolo ya Gamaliele, moko na balakisi ya malamukoleka ya eleko wana. Azalaki na mayele mingi mpe na boyebi, mpe ayekolaki Biblia malamumpenza.

³ Mpe namonaki boye, ete azalaki kokende na Damaseke, ná mikanda na libenga na ye, mpo na kokanga baoyo nyonso oyo bazalaki kati na nzela ya Nsango-malamu ya kala oyo epambolami, mpe mobali yango azalaki sembo. Kasi, nandimaka ntango nyonso ete uta Paulo amonáká Stefano kokufa, nakanisi ete likambo yango etikalaki mpenza na makanisi na ye. Ntango andimaki ete báboma Stefano, mpe asimbacki mikóto ya baoyo bazalaki koboma ye na mabángá, na bongo Paulo azuaki ngambo ya makila ya Stefano. Ayambolaki, mpe alobaki: “Nabongi ata te,” alobaki, “mpamba te nasopaki makila ya Ye—ya Ye, motatoli, Setefano.” Mpo azalaki nzeneneke na likambo yango.

⁴ Mpe soki ozali nzeneneke na likambo ata nini, okumbi ngambo lokola kaka ete osalaki yango. Boye soki tozali banzeneneke, tolobi: “Oh, iyo, basengelaki kosala bongo te, likambo oyo *boye-na-boye*,” kebaka na oyo olobaka, mpamba te okumbi ngambo na lolenge oyo makanisi na yo ezali kokende. Soki okoki kozua mokano te, koloba eloko moko te, tika yango kimia. Bongo soki otatoli ete ozali Moklisto, na ntango wana okumbi ngambo. Bomoni? Okumbi ngambo ya kozala Moklisto, mpe esengeli kobika kokokana na yango. Mpe ntango Nzambe apesi e—elaka na Biblia. . . Namoni moto moko awa, oyo afandi na kiti ya bibósono. Ntango Nzambe apesi elaka, Akumbi ngambo ya elaka yango soki Akokisi yango te. Ye, Nzambe akumbaka ngambo ntango Apesaka elaka. Mpe Makomi ekumbaka ngambo ya likambo kino Ekokisami. Bomoni? Ezali—Ezali mpenza wana lokola—lokola lisakola oyo Nzambe apesi. Mpe Esengeli kokokisama, soki te, Nzambe azali na ngambo. Bomoni?

5 Na bongo, Paulo, lokola molakisi, na nzela kokende na Damaseke mokolo yango, penepene, ntango molai pene na nzánga, nabanzi. Pole moko ya monene engengaki kouta na Likoló, mpe Ebomaki ye miso, mpe a—akweaki na nsé. Mpe alobaki alingaki koyeba soki ezalaki Nani. Alobaki ete Mongongo moko esololaki, mpe elobaki: “Saulo, Saulo, ozali konyokola Ngai mpo na nini?” Nandimi ezali mokapo ya 8 ya Misala.

Mpe alobaki: “Ezali Nani oyo nazali konyokola?”

6 Mpe Mongongo yango eyaki lisusu, mpe elobaki: “Ngai nazali Yesu.” Oh! “Ngai nazali Yesu, mpe ezali mpasi mpo na yo kotuta makolo na makonga.” Na bongo, Yesu azalaki nini na ntango yango? Yesu, Azalaki Pole, Pole moko ya monene mpenza, ezalaki kongenga.

7 Sikawa, mpo na kopesa biso mpiko mpe kotia mobóko awa. Ndenge nini Ye azalaki Pole, na ntango oyo Azalaki Moto? Sikawa, moko te . . .

Basoda mingi bazalaki elongo ná Paulo, bakengeli na tempelo, bazalaki kokende mpo na kokanga. Paulo azalaki kapiteni mokonzi. Mpe bazalaki kokende kokanga bato wana, mpo na ntina na mayangani na bango mpe bongo na bongo, mpe mpo na elikia na bango ya basambeli oyo ezalaki kati na bango.

8 Kasi, sikawa, awa Yesu azalaki lokola Pole monene. Sikawa, soki bomikaniseli, na ebandeli, Yesu azalaki Pole. Yesu azalaki Logos oyo ebimaki longwa na Nzambe. Mpe Azalaki . . . Azalaki Mwanje ya Kondimana oyo akambaki bana na Yisraele na kati ya lisobe. Mpe Azalaki Likonzi na Móto oyo bango bazalaki kotala. Mpe Azalaki . . . Ntango Azalaki awa na mokili, Alobaki: “Nauti na Nzambe, mpe Nazali kozonga epai na Nzambe.” Boye soki Autaki na Likonzi na Moto, kokóma Moto, na bongo soki Azongaki epai wapi Azalaki, Azongaki na Pole lisusu. Mpe Azalaki wana ntango Paulo amonaki Ye, Azalaki Pole.

9 Sikawa, basoda nyonso wana oyo bazalaki elongo ná Paulo bamonaki Pole yango te. Boye ekoki kosalema ete moto moko ámona Yango kasi bamosusu bámona Yango te? Na ntembe te. Malamu. Ye, Paulo, amonaki Yango, kasi baoyo batikali bamonaki Pole yango te.

10 Sikawa, ntango Petelo azalaki na boloko, tomonaki ete Pole yango eyaki kati na boloko, efungolaki bikuke yango. Mpe azalaki . . . Pole yango ebomaki basinzili nyonso batikali miso, wana bazalaki kobima, ntango Petelo alingaki kokende. Mpe ntango akomaki na ekuke, efungwamaki yango moko, na kimia, ekangamaki nsima na ye. Longwa na boloko ya kati, akendeki kino na ekuke ya libanda. Efungwamaki yango moko, ekangamaki na kimia. Na nsima akendeki kino na elekeli, abimaki na balabala ya engumba. Mpe apangusaki miso na ye, lokola mpo na koloba: “Nazalaki nde kolota?” Ayebaki te

likambo nini eutaki kosalema. Kasi, Mwanje na Nkolo, Mwanje yango moko, oyo azalaki Likonzi na Móto oyo ememaki Mose kino na mai na monana mpe efungolaki yango, oh, mpe Mbu Ekufá. . . Mbu Motane efungwamaki na ngambo nyonso mibale, mpe Yisraele balekaki.

¹¹ Mpe ntango bakomaki na Yaladene na ntango ya mpela, Amitalisaki Ye moko kuna te. Kasi Azalaki wana, mpamba te Autaki kofungola yango polele. Mpe bakatisaki yango na sánzá ya Minei, ntango bitando patátálú etondaka na mai. Mpe Atelemisaki printemps, mpe Asalaki ete matandala éniangwa te, mpo etutu ya mai ekobaki komata te; etelemaki. Wana nde Jehovah na biso. Wana nde Nkolo na biso Yesu. Etelemaki; mpe bakatisaki na makolo, na mabelé ekauká.

¹² Sikawa, Nzambe alakáki ete Akobatela bango, na bongo Asengelaki na elaka na Ye. Sikawa, Paulo, ayebaki makambo yango, mpe lokola ayebaki yango, azwaki litomba, mpamba te Nzambe azalaki koloba mbala moko na Paulo. Azalaki koloba na basoda oyo bazalaki elongo na ye te. Azalaki bobele koloba na Paulo.

¹³ Sikawa, ntango—ntango Mwanje na Nkolo akitaki, na lolenge ya monzoto; mpe bayekoli-minzoto, bato na mayele ya Inde, ntango, bamonaki Monzoto yango mpe balandaki Yango ba-kilometre nkama na nkama. Mpe elekaki likoló na bitalelo-minzoto nyonso, mpo ete bazalaki kotanga ntango na nzela na minzoto. Mpe moto moko te amonaki Monzoto yango, bobele bato na mayele wana. Oh, la la! Yango ezopesa bino nsái te?

¹⁴ Na bongo, bomoni, Nzambe asalaka na bibongiseli te. Asalaka na masanga ya bato te. Asalaka na moto na moto. Amimonisaka Ye moko na moto na moto. Mpe sikawa—sikawa nazali koloba oyo, ezali te oyo. . . Nzambe ayebi motema na ngai. Mpe nazali koloba oyo te mpo na ngai moko, mpo na lokumu na ngai moko; sikoyo, ezali kaka mpo nazalaki wana. Kasi, boyebi ete, Nzambe moko wana, Yesu moko wana, azali elongo ná biso na ntongo oyo? Boyebi, moko na moko na bino azali kobikela yango mwa moke sika-sikawa, ete Azali awa? Mpe ezali. . . Asaleli biso eloko moko na eleko oyo, oyo Ye asalaki te na bileko mosusu; Asali ete bákanga Ye photo na mokolo oyo. Tozali na Yango, etiami *kuna*. Bomoni? Likonzi na Móto, Nkolo Yesu yango moko.

¹⁵ Bótala ndenge Azali kosala sikawa. Soki Azali bobele Nkolo Yesu yango moko, Akosala makambo yango moko, mpamba te Biblia elobi: “Azali motindo moko lobi, lelo mpe libela.”

¹⁶ Sikawa, liboso ete Paulo áyebisa eloko ata nini, soki ezalaki solo to lokuta, akendeki liboso na Ejipto mpe alekisaki mibu misato, mpo áyeba soki ekokanaki na Makomi to te. Boyebaki yango? Nsima na Paulo kobongwana, akendeki na Ejipto

mibu misato. Afandaki kuna, mpe kuna nde ayekolaki bwanya monene oyo.

¹⁷ Sikawa, ezali mpo na komikokanisa na ye te, nazali bobele koyebisa bino ete Molimo Mosanto azali ndenge moko kino lelo. Sikawa, lingomba na ngai awa bayebi lisusu, eleki mibu mingi, ntango Mwanje oyo azalaki komonana mpe kolakisa makambo. Nazalaki kotia Yango mwa ntembe. Bino nyonso boyebi yango, bino bato ya kala. Soki bo . . . Soki ezali bongo, tombola loboko, soki oyóká yango. Iyo. Bótala, bótala lingomba, nzokande, euti na bato ya kala. Bomoni? Nazalaki na ntembe, mpo batei bazalaki koyebisa ngai ete Ezali ya zabolo. Mpe nakomaki lokola yango, kasi nazalaki kozela. Nazalaki kolinga kolobela Yango ata moke te.

¹⁸ Kasi, oh, Nkombo na Nkolo epambolama! Na mpokwa moko, kuna, Ayaki, Mwanje moko, mpe amonisaki Yango kati na Makomi, ete Ye azalaki. Mpe ntango namonaki Yango kati na Makomi, na bongo namemaki Yango na mokili mobimba, Nsango.

¹⁹ Banda wana Oral Robert abimaki, A. A. Allen, Tommy Osborn, Tommy Hicks, ná bamosusu. Bomoni? Ezali Nsango mpo na bato.

²⁰ Mpe Yesu azali ndenge moko lobi, lelo, mpe libela. Ezali na Makomi, Azali ndenge moko. Asalaka ndenge moko. Azali ndenge moko. Mpe Azali kosala ndenge moko. Azali komitalisa Ye moko ndenge moko. Mpe Azali awa, na ntongo oyo, ndenge moko. Sikawa, tokoki komona Ye; to te. Ézala soko nini, tozali kobikela yango sika-sikawa, ete Azali awa.

²¹ Sikawa, tomoni ete, Paulo, na likambo oyo abikelaki, mpe akomaki mikanda oyo, mingi kati na yango, longwa na boloko, akokanisaki Kondimana na Kala ná Kondimana na Sika. Sikawa bómikanisela, mokomi ya nsuka ya Biblia oyo, na nzela na mpemela, Nzambe akitaki mpe ayebisaki ye: “Soko moto moko abakisi eloko moko na Yango to alongoli eloko moko na Yango, ndenge moko mpo na ye, akolongolama na eteni na Buku na Bomoi.” Boye tómeke kobakisa ata eloko moko te na Yango. Oh, Esengeli kotikalala bobele ndenge Ezali, eloko moko esengeli kobakisama na Yango te. Mpe tosengeli kobunda mpo na nyonso oyo ezali kati na Yango. Nalingi ya koleka te, mpe nalingi ya kozanga te. Nalingi kaka oyo Yango elobi.

²² Sikawa, Buku oyo ya Baebele, ntina oyo naponi Yango; ntina moko, eloko moko; mokanda oyo, “Molingami Ndeko Branham,” mpe bongo na bongo. Mpe, na—na, tolingi kokangama na Liloba.

²³ Sikawa, mokapo na 1, ezalaki kotombola Yesu, boye Azali Oyo ya motuya koleka. Mpe Paulo ayebisaki biso, na mpokwa mosusu, ete Azalaki na ebandeli monene. Mpe tomonaki ete Azalaki bobele “Melekisedeke, Mokonzi ya Saleme,” oyo ya Monene na mokapo ya 7.

24 Mpe sikawa, na ntongo oyo, tokobelema na Ye longwa na—na mobóko mosusu, longwa na mokapo ya 2. Sikawa, nsima na Paulo kopesa biso Liteya monene mpe ya kokamwa oyo, ya kotombola Yesu: “Mpe asalaki ete ata Banje bákumbamela Ye.” Mpe nakanisi, awa, lokola mabelé, ekómi mobange mingi: “Mpe akogumba yango lokola elamba, kasi bango bakokufa, kasi Yo okotikala.”

25 Mpe na mokapo ya 2, to, molongo ya 2, nabanzi ezali yango: “Asololi na biso na mikolo oyo na nzela na Mwana na Ye.” Mpe, bótala: “Na ntango ya kala mpe ndenge mingi Asololaki na nzela na basakoli.” Toyekolaki yango mpe tomonaki oyo basakoli bazalaki, mpe ete Nzambe azalaki kopesa Nsango na Ye na nzela na basakoli. “Kasi na mokolo ya nsuka oyo, Alobi na nzela na Mwana na Ye, Yesu, na nzela na Molimo Mosanto. Asololaki na nzela na basakoli, na eleko wana.” Na nsima tozongaki nsima mpe tomonaki ete basakoli nyonso wana bazalaki na Molimo ya Klisto kati na bango.

26 Tozongaki epai ya Yosefe mpe tomonaki azalaki elilingi ya Klisto na ndenge ebongi be. Tozongaki epai na Mose mpe tomonaki ete azalaki elilingi ya Klisto na ndenge ebongi be. Bongo tokómaki kutu kino epai na Dawidi. Mpe ntango Dawidi aboyamaki na Yelusaleme, ayebaki te mpo na nini, kasi amataki likoló na ngomba mpe atalaki na nsima, likoló na Ngomba ya Bilya, mpe alelaki likoló na Yelusaleme mpo aboyamaki. Mibu nkama mwambe nsima na yango, Mwana na Dawidi aboyamaki lokola Mokonzi, na Yelusaleme, mpe afandaki likoló na ngomba yango moko mpe alelaki. Oh, Molimo na Klisto, kosaláká na moto na moto!

27 Sikawa, Paulo abandí koloba:

Mpo na yango esengeli na biso totia motema na etingia koleka na makambo masili biso koyoka, . . .

28 mokapo ya 2, sikawa, tobandi.

Na bongo esengelaki na biso kotia motema na etingia koleka na makambo masili biso koyoka, etc. . . ntango nyonso tobungisa yango te.

29 Oh, tika ete Nzambe áfandisa yango malamú kati na tabernacle oyo na ntongo oyo. Nabondeli ete Molimo Mosanto ázindisa yango mpenza na bozindo ya mitema na bino. “Tosengeli kotia motema na etingia koleka mpenza na makambo masili biso koyoka.” Tosengelaki tozala bato ya motindo nini, ntango tomonaka Jehovah monene kokita mpe kosala makambo oyo Asalaka, mpe wana tokokanisi yango, Likomi na Likomi, tomonaka ete ezali Solo? Mpe mbala mosusu tofandaka likoló na eteni ya nzete, kosaláká eloko te, mpe etungisaka biso te. Tosengelaki kosala eloko moko, miniti nyonso, koluka komema bato epai na Klisto. Tosengelaki kozala mabanga ya bomoi. Tosengelaki kozala goigoi te, ndenge tozalaka. Tokokende na

losambo, mpe tokomona Nkolo Yesu kosala eloko moko, to—to kopambola biso na ndenge ya kokamwa, na nsima to—tokobima mpe tolobi: “Liyangani kitoko mpenza.”

³⁰ Sikawa, liteya ya Liloba, tosepelaka na yango, kasi yango nde eloko ya motuya te. Yango te. Tosengelaki kokumbamela Nkolo kaka nsima na liteya ya Liloba te, ndenge tosalaka mbala mingi, kokumbamela Ye kaka. Wana ezali malamumu mingi. Kasi tosengelaki kokumbamela Ye na ngonga nyonso ya bomoi na biso. Ntango tozali na mosala, tosengelaki kokumbamela Ye. Mbala nyonso libaku emonani, kumbamela Nkolo na kotatoláká na ntina na Ye.

Soki bomoni, basi mosusu kati na bino, soki bomoni mwasi moko na mabe, bókumbamela Nkolo na komemaká ye pembeni mpe koloba: “Ndeko mwasi, bomoi ya malamumu koleka oyo ezali.”

³¹ Bino mibali na mosala na bino, Ntango boyoki moto moko kokamata Nkombo na Nkolo mpamba, zwa libaku moko ya kobendana na pembeni, na nkuku, kamata ye na loboko, mpe loba: “Tala, bomoi ya malamumu koleka oyo ezali. Osengelaki kosalela maloba wana te.” Mpe yebisa ye na ndenge moko kosokema, mpe na boboto. Makambo nyonso wana ezali kokumbamela.

Mpe soki tomoni moto moko na bokono, mpe monganga alobi ete likambo ya kosala ezali lisusu te, biso tosengeli kokumbamela Nkolo na koyebisáká bango: “Nzambe ya Lola moko azali, oyo ayanolaka mabondeli.”

³² Na bongo ntango tozali komona makambo yango kosalema, oyo tomonaka kokóma mpe kosalema, tosengeli kotika ata moke te makambo oyo koselimwa. Totikaka yango éleka biso na katikati ya misapi. Yango nde likambo ná lingomba monene ya Pentecote lelo. Batiki ete makambo ya malamumu koleka éleka bango na katikati ya misapi, na ntango oyo basimbaki yango na maboko na bango. Kasi, bótala ndenge basali, basali lokola mangomba mosusu nyonso. “Balandaki botomb- . . . nzela ya Kora, mpe bakufi; mpe nzela ya Kaina, mpe bakwei na botomboki ya Kora.”

³³ Bakómi ebongiseli. Na esika ete tózala na bondeko epai biso nyonso tokokaki kozala moko, bango bamikómisi ebongiseli. Basali bibongiseli mike mike mpe mwa ba-izme, mpe bafuluki kuna mpe babuki bondeko. Mpe soki bokebi te, ba-Batiste ná ba-Presbytérien bakozua likambo yango, mpamba te, “Nzambe azali na makoki ya kotelemisa longwa na mabanga oyo bana mpo na Abraham.” Mpe to—totiki yango koselimwa mosika na maboko na kozangáká bomoko.

³⁴ Ndenge nini ba-Indien babungisaki mboka oyo na maboko ya mondele? Ezali mpo bazangaki bomoko. Soki básalaka liboso moko monene ya etumba. . . . Kasi bango bakómaki kobunda

bango na bango. Balingaki kobatela mabelé na bango soki bango nyonso básanganaka elongo.

35 Tokobungisa likambo yango ndenge nini? Mpo tozali na bomoko te. Tobungisi makambo oyo tobikelaka na Nzambe, ezali mpo tokabwani. Tosali etonga moko, mpe tobengi *oyo* ba—ba—Metodiste, mpe *oyo* ba—Batiste, mpe *oyo* ba—Assemblée, mpe *oyo* ba—Unitaire, mpe *oyo eloko mosusu*, mpe ba—église de Dieu, mpe ba—Nazareen, ba—Pèlerin de la Sainteté. Tozali kokabola Nzoto ya Klisto. Tosengelaki kokabwana ata moke te. Tokoki kokesana na makanisi, kasi tózala bandeko oyo basangani kati na mitema. Nzambe alingi ete tózala bongo. Akufaki mpo na Lingomba mobimba ya Nzambe. Mpe tolingi te ete tózala na bomoko te.

Sasaipi *esengeli na biso kotia motema na etingia koleka mpenza . . . ete ntango nyonso tobungisa yango te.*

Mpo ete soko maloba malobamaki na banje matelemaki ngwi, . . .

36 Boyoki Yango? “Soko liloba lilobami na banje . . .” Sikawa, *mwanje* azali “motindami”. Liloba oyo *mwanje* elingi koloba “motindami”. Mpe touti koyekola yango, na buku ya 1 awa, “Nzambe, na ntango ya kala mpe na ndenge mingi, asololaki na batata na nzela na basakoli.” Bazalaki batindami na Nzambe. Mpe bazalaki, soko bazalaki batindami na Nzambe, bazalaki banje na Nzambe. Motindami azali *mwanje*; to *mwanje* azali motindami, nde.

37 Motindami! Ozali motindami, na ntongo oyo. Ozali . . . Ozali motindami ya nsango-malamu to motindami ya nsango-mabe. Oh, ezali kitoko, koyeba ete tozali bantoma, ete tozali banje, batindami ya lisekwa, boye te? Mpe tozali batindami ya Nzambe mpo na mokili oyo ya masumu, ete Klisto azali na bomoi. Kati na mitema na biso, Azali na bomoi. Kati na milimo na biso, Azali na bomoi. Mpe Ye abimisi biso longwa na bomoi ya mabe ya masumu, mpe atomboli biso likoló, mpe apesi biso “aleluya” na elimo na biso, mpe akómisi biso bikelamo ya sika. Tozali batindami, banje ya Kondimana. Ezali mpenza malamau!

38 Mpe sikawa, na Kondimana na Kala, “Soko—soko liloba oyo lilobamaki na banje etelemaki ngwi,” na bongo esengelaki kozala solo. Na Kondimana na Kala, liboso ete liloba ya mosakoli ékoka kotalisama, esengelaki kolandelama mpe kondimisama. Bazalaki kozua yango na petee te, lokola biso lelo.

39 Okei kuna mpe otuntuki mwa moke, to eloko mosusu: “Oh, nkembo na Nzambe, yango nde!” Ozali na libunga.

Biblia elobaki, ete: “Na mikolo na nsuka, zabolo akomekola Boklisto, ekozala mpenza pene, na lolenge ete ekopengwisa Baponami mpenza, soko nde ekokoka.” Ya solo. Boye, tosengeli komeka yango.

40 Mpe bazalaki komeka yango ndenge nini na mokolo na bango? Na Urimi Tumimi. Etando ya ntólo ya Alona, oyo ezalaki na mabanga wana kati na yango: kabunkele, yasipi, diamá, rubi, safiri. Mabanga wana nyonso, oyo ezalaki kotalisa mbotama ya bampaka zomi na mibale, ezalaki na etando ya ntólo ya Alona. Mpe ntango mosakoli moko asakolaki, mpe Pole ya búle wana engengelaki yango, Nzambe alobaki: “Ezali Solo.” Kasi, etali te soko emonanaki malamú ndenge nini, soki epeleli-peleli yango te, ezalaki Solo te. Boye, Urimi Tumimi yango ezalaki kotambola elongo na bonganga wana.

41 Kasi Biblia oyo ezali Urimi Tumimi ya Nzambe lelo. Mpe ntango mosakoli moko asakoli, esengeli mpenza kopela-pela elongo ná Biblia. Bongo, Nzambe alobi, na nsima Akokita mpo na kondimisa Yango.

42 Oh, nakoki mpenza kokumisa Nzambe lelo! Nazokanisa na ntina na ntongo ya lomingo mosusu, lokola oyo mwa moke, ntango nazalaki kotika tabernacle. Mpe bino bozalaki kolela mpe kosenga ngai ete nakende te. Kasi, ntango, nateyaki likoló na Dawidi mpe Goliata, mpe ndenge nini okokutana na mokili ya malili wana, oyo ezangi kotia motema na makambo, oyo elobaka ete ntango ya bikamwa eleká.

43 Nalobaki: “Ezali na engambé bobele moko, mpe na ntango oyo kaka tokoki koboma ye, bamosusu bakoyika mpiko.” Mpe Nkolo asalaki yango. Na nsima, Oral Roberts moko ayaki, ná Jagers moko, mpe bongo na bongo, babimisaki Mopanga, tobundisaki mpe tobimisaki monguna libanda na mboka, tokangaki bango minoko. Bakoki koloba te ete bikamwiseli esalemaka te, mpamba te yango oyo. Ya solo. Liloba na Nzambe ezali Seko. Epela-pelaka likoló na Urimi. Epela-pelaka likoló na Liloba, yango nde Urimi Tumimi na Ye. Mpe ntango epela-pelaki likoló na Yango, ezalaki solo mpenza yango.

Mpe epai na moto nyonso oyo azali na bosenga, soki ozali mosumuki, mpe olingi koyeba ndenge nini okoki kobikisama: “Ndimela Nkolo Yesu Klisto.”

44 Lelo, tozali na makambo mingi mpenza oyo osengeli kosala. “Osengeli kobalola lokasa ya sika. Osengeli kosala *oyo* mpe kosala *oyo kuna*, mpo na kobikisama.”

Nakanisi Mofilipi mokengeli ya boloko, ntango mokengeli ya boloko yango atunaki Paulo: “Nasala nini mpo ná bikisama?”

Soki ezalaki yo to ngai, tolingaki koyebisa ye makambo oyo asengelaki kosala *te*. “Osengeli kotika komela masanga. Osengelaki kotika ma—masano na yo ya mbongo. Osengeli kotika *oyo*. Osengeli kotika *oyo wana*.”

Paulo ayebisaki ye bongo te. Ayebisaki ye bobele makambo oyo *asengelaki* kosala. “Ndimelá Nkolo Yesu Klisto, mpe okobika.”

45 Sikawa: “Ye oyo akoyoka Maloba na Ngai mpe akondima Motindi na Ngai azali na Bomoi ya seko.” Yango nde Urimi Tumimi oyo ezali kopela-pela, Santu Yoane 5:24. “Ngai nazali Nkolo oyo abikisaka malali na yo nyonso.” Yakobo 5:14: “Benga bampaka, pakola bango mafuta, libondeli ya kondima ekobikisa mobeli.” Urimi epeli-peli. Bomoni? Yango nde Liloba na Nzambe ya Seko.

46 Etali ngai te ba-athée, bazangi kondima, batioli na Nzambe to babeti ntembe boni bakotelema. Nzambe akokokisa Liloba na Ye. Alakaki ete Akosala yango.

47 “Mpe tosengeli kotia motema na etingia koleka na makambo masili biso koyoka, ete ntango nyonso tobungisa yango te. Mpo soko liloba oyo elobamaki na banje (basakoli) etelemaki ngwi. . .” Ekokisamaki? Tokoki kolekisa mpóso mobimba likoló na yango.

48 Ntango Mose alobaki, etelemaki ngwi? Ezalaki mpenza bongo.

Bongo Eliya, ntango azalaki likoló na ngomba? Nkolo alobaki na ye: “Mata kuna, Eliya. Nakozala kuna elongo ná yo; Nazali na mposa ya mwa lisolo ya bondeko.” Nzambe alingaka lisolo ya bondeko ná bato na ye. Kasi biso tolingaka kofanda kimia ntango molai te mpo Asolola na biso. Tozali na mosala mingi ya kopumbwa-pumbwa, bisika na bisika, ná makambo ebele. “Fanda kimia, Eliya.” Azalaki na mposa ya mibu misato mpe sánzá motoba ya lisolo na bondeko. Tozokoka kopesa Ye miniti ata misato te. Mibu misato na sánzá motoba ya lisolo ya bondeko ntango nyonso. Oh, nalingaka yango! Alobaki, “Komitungisa te mpo na kolamba; tokozala na bilei oyo esili kolambama. Biyanganga nde ekoleisa yo. Mpe nyonso ekozala malamú. Nazali bobele na mposa ya mwa lisolo ya bondeko.” Mobange ya mosakoli oyo, Eliya, afandaki kuna likoló na ngomba, ntango azalaki kosolola na Nzambe, ee, kapiténí alobaki: “Nakanisi ete nakomata kuna mpo názwa ye.” Sikawa, komeka kokata lisolo ya bondeko wana ata moke te.

49 Boye, kapiténí amataki, na lipinga na ye monene ya mibali, ntuku mitano. Mpe alobaki: “Na—na—nayeí kozwa yo, Eliya.”

50 Mpe Eliya atelemaki. Bókeba, oyo mosakoli ya Nkolo! Alobaki: “Soki nazali mosali na Nkolo, tika ete móto ékita uta na likoló mpe ézikisa bino nye.” Mpe móto ekitaki. Kapiténí alobaki. . .

51 “Oh, boyebi?” Mokonzi, kutu, alobaki: “Ezalaki ntango mosusu nka—nkake, mokalikali moko elekaki likoló, mpe ebetaki bango. Nakotinda ntuku mitano mosusu.”

52 Eliya atelemaki, moko na banje, liloba na ye etelemi ngwi. Asengelaki kozala mbano ya solo mpo na nyonso oyo esalemaki mabe. Alobaki: “Soki nazali mosali na Nkolo, tika ete móto éya.”

Mpe ntuku mitano ya mibale bazikaki. Malamu. Etumbu mpo na nyonso!

Mpo ete soko liloba lilobamaki na banje etelemaki ngwi, mpe kobuka mobeko nyonso mpe kozanga bokonde ezwaki etumbu na sembo . . .

53 Sikawa, likambo ya monene yango oyo, molongo oyo elandi.

Biso mpenza tokokima boni, . . .

54 “Biso mpenza tokokima boni?” Soki mongongo ya Eliya ememaki libebi, mpo azalaki mwanje na Nkolo, biso mpenza tokokima boni, ntango Mongongo na Klisto nde ezali koloba? To, tokozanga elóna ndenge nini, ntango babondeli mpo na yo, soki Ezali Mongongo ya Klisto? Soko Klisto abongisaki Lingomba na Ye ébondela mpo na babeli, mpe Lingomba yango esali oyo Ye alobi Ye . . . mpo na bango básala, bongo ndenge nini Ekoki kokweya? Ekoki te. Bino bokoki kokwea, kasi Yango ekoki kokweya te. Mpe na ntango nyonso oyo okotosa Yango, Ekomema yo esika esengeli.

55 Soki okwei, okwei na ndenge na yo moko. Obimi nde libanda na Liloba. Kasi na ntango nyonso oyo okangami na Liloba, Ekoki kokweya te. Mpo liloba ya basakoli esalaki *boye-na-boye*, koleka boni Liloba ya Klisto ekozala?

Biso mpenza tokokima boni, soko tokotia mitema na lobiko monene boye te; oyo ezali liboso ebandi kosakolama epai na biso na nzela na Nkolo, mpe endimisamaki epai na biso na baoyo bayokaki ye;

56 Bókanisa Yango, esakolami na Nkolo. Mbala boni tokoki kozonga nsima? Tokoki kotelema wapi, awa mpo na ngonga moko? Ntango Yesu ayaki, Azali motindo moko lobi, lelo mpe libela.

57 Sikawa, bómikanisela, ebandaki kolobama liboso na Yesu, Ye moko, na nsima, endimisamaki na baoyo bayokaki Ye. Sikawa bóyoka Ye.

58 Ntango Ayaki na mabelé, Ye abetaki ntólo te ete azalaki mobikisi babeli. Alobaki: “Ezali Ngai te oyo asalaka misala yango; ezali nde Tata na Ngai oyo afandi kati na Ngai. Ye nde asalaka misala yango. Mwana akoki kosala eloko moko te na Ye moko, kasi bobele yango emoni Ye Tata kosala,” Santu Yoane 5:19.

59 Bótala ntango Filipino ayaki epai na Ye. Natanaele . . . Nsima na Filipino kobongola motema, akendeki kuna, mpe azwaki Natanaele. Alobaki: “Yaka komona Nani oyo tokutani na ye: Yesu ya Nasaréte, Mwana na Yosefe.”

60 Mpe alobaki: “Eloko ya malamú ekoki kouta na Nasaréte?”

61 Alobaki: “Yaka, komona.” Ndenge wana nde bandimisamaka: méká Yango. Yaka komona. Oh, yango nde oyo ya malamú koleka natikálá koyoka. Yaka komona yo moko.

Kotelema na mopanzi te mpo na koloba mabe, kasi: “Bómeka makambo nyonso, mpe bósimba ngwi oyo ezali malamumu.” Yaka komona.

62 Wana bazalaki kokende, kosololáká. Ntango akómaki Liboso na Nkolo Yesu, Alobaki: “Tala Moyisraele oyo kati na ye bokosi ezali te.”

63 Esilisaki ye mai na nzoto mpenza. Atalaki zingazinga, alobaki: “Malamu, Rabi, Oyebaki ngai ntango nini? Otikálá komona ngai te. Oyebi ngai ndenge nini?” Filipo alobaki. . .

64 “Liboso, ntango abengaki. . .” Alobaki: “Liboso ete Filipo ábenga yo, lobi, ntango ozalaki na nse ya nzete ya mosuke, Namonaki yo.” Amen.

65 Alobaki: “Ozali Mwana na Nzambe. Ozali Mokonzi ya Yisraele.”

66 Mwasi moko ayaki Liboso na Ye, mpe Alobaki: “Kende kozwa mobali na yo.”

Alobaki: “Nazali na mobali te.”

67 Alobaki: “Ya solo. Ozali na bango mitano, mpe oyo ozali kobika na ye sikoyo azali ya yo te. Olobi solo.” Bókanisa yango naino.

68 Alobaki: “Mesie, namoni ete Ozali Mosakoli. Mpamba te, toyebi ete ntango Masiya akoya, Akoyebisa biso makambo nyonso.”

69 Alobaki: “Ngai nazali Ye, oyo azali kosolola na yo.”

70 Bongo akendeki mbangu koyebisa bato ya engumba, “Boya komona Moto Oyo ayebisi ngai makambo nyonso nasakaki. Oyo nde Masiya yango te?” Elobamaki na Nkolo.

71 Nini esalemaki? Yesu alobaki, liboso Ákende: “Makambo oyo Nazali kosala, bino mpe bokosala.” Ya solo? “Makambo oyo Nazali kosala, bino mpe bokosala yango, kutu mingi koleka oyo, mpo ete Nakokenda epai na Tata.” Oh, nakoki komona bango ndenge bakendeki, bipai nyonso. Malako 16: “Bakendeki bipai nyonso, koteyáká; Nkolo azalaki kosala elongo na bango, kondimisáká Liloba.”

Mpe awa, Paulo, azali koloba ndenge moko. Alobaki ete—ete Nsango-malamu ebandaki koteyama liboso na Yesu, mpe endimisamaki epai na biso na baoyo bayokaki Ye. Yango nde Libanga ya Mobóko. Oh, Nkombo na Nkolo epambolama! Yango nde Libanga ya Mobóko.

72 Mpe kokanisa ete mibu nkoto mibale esili koleka. Ba-athée batelemaki, mpe bazangi kondima, mpe babeti ntembe, mpe batioli. Kasi, lelo, Yesu moko wana azali kondimisa Liloba na Ye ndenge moko, na baoyo bazali koyoka Ye. “Koyoka Ye,” elingi koloba te bobele koyoka liteya. Elingi koloba, koyoka Ye. Iyo.

⁷³ Tokokima boni? Wapi ekimelo na biso? Oo, okoloba: “Nzambe ápambolama, nazali moto ya lingomba Metodiste. Nazali Presbytérien. Nazali mo-Pentecotiste.” Etali Yango na eloko ata moko te. Mpe bokendeke pembeni mpe bolingaka kobenga Yango “spiritisme, to télépathie mentale, to molimo mabe,” to eloko mosusu. Nsoni na bango!

⁷⁴ “Soko liloba moko na moko etelemaki ngwi na nzela na banje. . .” Yesu alobaki: “Ezali te. . . Nsima na mwa ntango, mokili ekomona Ngai lisusu te. Nde, bino bokomona Ngai, mpo Nakozala elongo na bino, ata kati na bino, kino na nsuka ya ekeke.” Mpe ntango tozali komona Ye kokita, mpo na kokoba kokokisa Liloba na Ye, tokokima boni soko totii motema nde na lingomba moko boye, to na ebongiseli moko boye, to denomination, to mwa makanisi moke ya biso moko? Ekozala malamau ete bótika yango. “Mpamba te masumu nyonso ezwaki etumbu na sembo na nse ya banje, koleka boni ntango Mwana na Nzambe azali koloba uta na Likoló, mpo na kotalisa Liloba na Ye polele! Tokokima boni, soko tokotia mitema na lobiko monene boye te?” Oh, la la! “Nzambe mpe. . .”

Molongo ya 4:

Nzambe mpe atalaki yango, . . .

⁷⁵ Bótala oyo. Nkolo atalaki yango. Oh, nazali na esengo mingi mpo na yango! Nkolo atalaki yango.

⁷⁶ Bótala. Ntango Eliya afandaki likoló na ngomba, alobaki: “Soki nazali moto na Nzambe, tika ete móto ekita uta na Likoló mpe ezikisa bino.” Nzambe atalaki ete *azalaki* moto na Nzambe.

Nzambe atalaki ntango nyonso. Bomo na yo ekotatola. Nayebi te oyo litatoli na yo ezali, kasi bomoi na yo elobaka makasi mingi, na lolenge ete mongongo na yo ekoki koyokama te. Kasi, bo—bomoi na yo, bomoi na yo ya mokolo na mokolo ekotatola oyo yo ozali. Nzambe atalaka. Iyo. Molimo Mosantu azali elembo, mpe elembo ezwaka ngámbo nyonso mibale ya lokasa. Bazali komona yo ntango ozali *awa* mpe bakomona yo ntango okeyi. Kaka na ndakonzambe te kasi na mosala ya mokolo na mokolo. Otiami elembo na ngámbo nyonso mibale, na kati mpe na libanda. Na esengo oyo ozali na yango, mpe na bomoi oyo ozali kobika, otiami elembo, na kati mpe na libanda, ete oyebi ete obikisami mpe mokili eyebi ete obikisami, na bomoi oyo ozali kobika, mpamba te Nzambe azali kotatola. Nkombo na Ye Mosantu épambolama! Oh, namiyoki moto ya losambo!

⁷⁷ Bókanisa naino, bandeko, kuna. Oh! “Bampate na Ngai bayokaka Mongongo na Ngai, mpe bakolanda mopaya te.” Oh, ba-nkombo na biso ezali na kati na matandu ya maboko na Ye! Ezalaka liboso na Ye, butu-moi. Liloba na Ye ezalaka ntango nyonso liboso na Ye, Elaká na Ye. Akoki kobosana yango te. Mpe Ye alingi bino.

⁷⁸ Sikawa, Akotatola mpo na baoyo ya Ye moko. Okofungola monoko te mpo na koloba liloba moko, mokili ekoyeba ete eloko moko ekómeli yo.

. . . kopesa *litatoli*, na *bilembo mpe bikamwiseli*, mpe na *misala na nguya ya ndenge na ndenge*, mpe *makabo ya Molimo Mosanto*, kokokana na mokano na ye moko?

⁷⁹ Tózwa bobele eteni moko ya Likomi sikawa liboso ya kosukisa; na Mokolo ya Pantekote, ntango bazwaki Molimo Mosanto. Nsima na mikolo minei, Petelo alekaki na ekuke oyo ebiangami Kitoko, ye ná Yoane. Balobaki: “Tala biso,” epai na moto moko. Mpe alobaki: “Palata mpe wolo nazali na yango te, kasi oyo nazali na yango nakopesa yo. Na Nkombo na Yesu Klisto ya Nasaréte, telema mpe tambola.” Mpe moto yango atombolaki miso mpe abetaki ntembe na eloko moko na ntina na yango te. Atelemaki kaka mpe akendeki. Bazalaki baíngá mpe bato batángá te. Kasi Biblia elobi: “Basengelaki kokeba na bango, mpamba te bayebaki ete bazalaki elongo ná Yesu.”

⁸⁰ Ndeko, ntango mokili eyebi ete ozalaki elongo ná Yesu, ntango okoki kobika mpenza bomoi moko ebebisami te na mokili ya lelo mpe na molili oyo, oyo mokili eyebi mpe ekoki komona ete ozalaki elongo ná Yesu, ntango mwasi moko ya bomoi mabe, ya pite ya balabala akoki kokóma mwasi ya lokumu, oyo asukolami na Makila ya Mwana na Mpate, Nzambe azali kotatola ete Azali na bomoi.

⁸¹ Zwá molangwi masanga moko, oyo asili mpenza ngala na lolenge ete akotungisa mwasi na ye, oyo akonyokola bana na ye, mpe akopimela bango bilei, mpo na kobebisa mbongo na mwasi na pite. Tika ye ákutana ná Yesu mbala moko, bokomona ye kozonga, lokola Ebele, oyo lisosoli na ye ezongaki mpe alataki bilamba, epai ya bana na ye mpe epai ya mwasi na ye, ná epai ya balingami na ye. Solo mpenza.

⁸² Eleki mwa ntango, eleki mibu penepene ntuku minei, ntango bisambo ya mokili ekutanaki, mpe bato ndenge na ndenge batelemaki mpe balobaki. Mpe Mizilman alobaki mpo na losambo ya Bamizilman. Ba-Jaïn balobaki mpo na ba-Jaïn; ba-Buddhiste mpo na Buddha. Mpe ntango elenge molakisi wana, nabosani nkombo na ye ya libota, kaka sikawa, Nayebaki nkombo na ye, kasi nabosani yango, alobaki mpo na kotalisa Boklisto, mpe alobaki likambo ya Mwasi Maccabee ya Oklahoma, na America.

Azalaki na nkanza mingi mpe na mabe mingi, na lolenge ete, ata ntango bakendaki koboma ye, balingaki ata kosimba ye te, azalaki mpenza na mabe ya nsóni mpe mbindo. Bakangaki ye mpo: azalaki komela cigar; kotambwisa motuka ya likalo; mpe abukaki mi—mi—mibeko, ndenge ekomami na mikanda ya kala ya Oklahoma, ntango alekaki na balabala, kotambwisáká likalo ya mpunda minei. Mpe azalaki mbindo mpenza mpe na

bosoto mpenza na lolenge ete bato bazalaki ata kolinga te kozala zingazinga esika ye azalaki; na lolenge ete, ntango babomi oyo balingaki koboma ye, balingaki te kotia ye nsinga na nkingo. Basopaki kaka goudron ná nsalá likoló na ye, mpo na koboma ye.

Mpe ntango elenge motei oyo abetaki lisolo ya mwasi yango, esimbaki mitema na bango, kino ete bato bafandaki na sǒngé ya bifandelo na bango, koyoka likambo oyo elingaki kolanda. Ntango akómaki na likambo yango: mwasi ya mbindo, ya bosoto, azángá lokumu, kino bato na mibeko bazalaki ata na ntango ya kobebisa te ná ye, azangaki mpenza lokumu. Zabolo mpenza ya lifelo akokaki koboya moto ya bongo, tóloba, ndenge abetaki lisolo yango. Na nsima alobaki: “Bino mibali ya masambo ya mokili mobimba, losambo na bino ezali nde na eloko moko oyo ekoki kopetola maboko ya Mwasi Maccabee?”

⁸³ Bango nyonso bafandaki kimia. Na nsima abetaki maboko, mpe apumbwaki likoló. Alobaki: “Nkembo na Nzambe! Makila na Yesu Klisto ekopetola kaka maboko na ye te, kasi Ekopetola motema na ye mpe Ekokomisa ye Mwasi-na-libala na Ye.” Bóyoka:

Ngolu ya kokamwa! mongongo kitoko,
Oyo ebikisaki moto na mawa lokola ngai!
Kala nabungaki, kasi sikawa nazwami,
Nazalaki mokúfi miso, kasi sikawa namoni.

Ngolu nde elakisaki motema na ngai kobanga,
Ngolu nde elongolaki nsómo na ngai;
Ngolu yango ezalaki na motuya mingi
Na ngonga oyo nandimaki liboso!

⁸⁴ Ya solo. “Tokokima boni, soki tobayi likambo ya boye?” Soki oboyi kolia, okokufa. Soki oboyi kobaluka na litumu, okosala likama. Soki oboyi kobimisa miliki na ngombe, ekokauka. Soki oboyi kosukola mino na yo, ekosengela na yo kolongolisa yango nyonso. Na ntembe te. Okofuta mpo na bopoto na nyo.

⁸⁵ O Branham Tabernacle mpe bino bapaya, tika náyebisa bino likambo moko sikawa. Soki otii motema te na kotatola mpo na nkembo na Nzambe, soki otii motema te na kopesa Nzambe lokumu mpe nkembo, okokoma malilimalili, zololo, mpe okozonga nsima, moko na mikolo oyo. Pesaka Nzambe lokumu. “Tokokima boni, soko tokotia motema na lobiko monene boye te?”

⁸⁶ Ntango ekei. Nauti komona Ndeko Thom, auti kokóta na nsima kuna. Tokosukisa mpe tokokóba na oyo na mpokwa, soki Nkolo alingi.

Tóbondela mwa moke.

⁸⁷ Tata na biso na Likoló, mapamboli, masanzoli, lokumu, nkembo, mpe bwanya ézonga epai na Yo, mpe makasi, ná nguya, libela na libela. Oh, epai na Mwana-mpate oyo afandi na Ngwende, bonkolo mpe mikonzi mpe nyonso epesamaki na

loboko na Ye. Ntango Asekwaki longwa na bakufi, mpo na kolongisama na biso, Agangaki epai na mokili, “Nguya nyonso na Likoló mpe na nsé epesami na loboko na Ngai. Boye, bókende na mokili mobimba mpe bóteya Nsango-malamu.”

O Mwana-mpate oyo alingi kokufa, Makila na
Yo ya motuya
Ekobungisa nguya na Yango mokolo moko te,
Kino ete Lingomba mobimba ya Nzambe, oyo
esikolami
Ekobikisama, ete ésumuka lisusu te.

⁸⁸ Sunga biso, lokola batei, komona ete tosengaka mingi mpenza; tosengeli kozala na lingomba, tosengeli kozala na *oyo*, tosengeli kozala na nyonso.

⁸⁹ Basi na biso, liboso ya kokende na losambo, atako bamibengaka Baklisto, basengeli kozala na lolenge moko ya molato, to basengeli kolata malamau mingi.

Mpe bateyi basengeli kozwa motango moko boye ya mbongo, liboso baya, mpe nyonso esengeli kozala *boye na boye*.

⁹⁰ O Klisto, ntango nazali kotanga awa, boni “bazalaki kotelengana, kati na mposo ya mpate mpe mposo ya ntaba, babikaki kati na madusu ya mabelé, mpe mibéngá, bazalaki kotelengana, kati na minyoko ya mabe, mpe ata bongo, bazwaki Kondima,” na lotomo ya banje, tokokima boni, ntango Nkolo Yesu apesi biso bandako kitoko, mpe mituka, mpe bilamba, mpe bilei, kasi tozali koyima-yima, tofandi zingazinga, tokomi na goigoi, tomekaka ata moke te kobima mpo na kosala eloko moko na ntina na yango, tokokima boni, Nzambe?

⁹¹ Oh, nabondeli ete Ozikisa kokweisama ya lolenge ya kala kati na motema nyonso, na ntongo oyo, Nkolo, mpo bato bakoka kotelema mpe kobanda mosala. Tika ete tósala ntango mói ezali naino kongenga, mpo ete mói ezali kokende na kolala noki. Mpe civilisation ezali kosuka, mpe ntango ekozala lisusu te. Ekonangwa kati na Seko-na-Seko.

⁹² E Nzambe, sala lelo ete tókende ná emononeli ya sika, ná bwanya, ná lisosoli, mpo na koyeba ndenge ya kobelema na basumuki mpe komema bango epai na Klisto. Yoka libondeli ya mosali na Yo, Nkolo.

⁹³ Nasengi, soko moto moko azali awa, oyo ayebi Klisto te lokola Mobikisi na ye, okolinga kotómbola loboko mpe koloba: “Kanisa ngai, Ndeko Branham”? Okolinga bobele kotombola loboko, mpo na koloba: “Kanisa ngai. Nalingi kozala Moklisto. Nalingi lisusu kotala yango mpamba te”? Nzambe apambola yo, kuna na nsima, mesie. Moto mosusu? Loba: “Nalingi kotombola loboko, Ndeko Branham. Mpe nalingi koyamba Klisto, lokola Mobikisi na ngai, natalaki yango mpamba, na ntango nyonso oyo. Oh, nasambelaka, na ntembe te, nazali mondimi ya lingomba.”



BAEBELE, MOKAPO YA MIBALE 1 LIN57-0825M

(Hebrews, Chapter Two ¹)

MATEYA LIKOLO NA BUKU YA BAEBELE

Liteya ya Ndeko William Marrion Branham oyo, eteyamaki liboso na Anglais mokolo mwa Lomingo na ntongo, mwa 25 na sanza ya Mwambe, na mobu 1957, na Branham Tabernacle na Jeffersonville, Indiana, U.S.A., ekamatamaki uta na bande pe ekomamaki mobimba na Anglais. Ndimbola ya Lingala oyo ekomami pe ekabolami na Voice Of God Recordings.

LINGALA

©2023 VGR, ALL RIGHTS RESERVED

VOICE OF GOD RECORDINGS

P.O. Box 950, JEFFERSONVILLE, INDIANA 47131 U.S.A.

www.branham.org

Liyebisi ya makoki ya mokolo-eloko

Makoki nyonso ekopesama na ndingisa. Búku oyo, ekoki kozala imprimé na masíni ya ndako mpo na yo moko to kokabama, ofelé, lokola esalelo mpo na kopalanganisa Nsango Malamu ya Yesu Klisto. Búku oyo ekoki kotekama te, koyíkanisama te, kotiana na site internet te, kobombama mpo na kolukaluka te, kolimbolama na nkota mosusu te, to kosalela yango mpo na kosenga misolo te, kozanga ndingisa ekomami mpenza na Voice Of God Recordings®.

Soki olingi koyeba makambo mosusu to kozua bisalelo mosusu, komélá:

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org